



Pranimi / Prizetimi / Prilazje / Prilazje / Received / Delivery	09.09.2023	3	viti / god. year
Organ / Njësia / Organ / Jednica / Org. Unit	No. Post / No. Post / Post No.	Shm. / Prijazje / Appendix	Sasia / Kolicina / Quantity
SKANSHCK	5936/2023		116



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.937/2023

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Malsore Gashi-Bajraktari-kryetare, Arben Mehmeti, Ardita Haxhnikaj-Demi-anëtar, me Kaltrina Avdullahi-Prenaj -Zyrtare e Lartë për Bashkëpunim Profesional, në cilësinë e procesmbajtëses, ka shqyrtuar ankesën me numër A.nr.937/2023 të datës 07.07.2023 të parashtruar nga ankuesi me adresë:

kundër organit të punësimit Agjencioni Kosovarë i Privatizimit, në çështjen juridike “*kërkesë nga marrëdhënia e punës*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafin 3 dhe nenin 18 paragrafin 1 nën paragrafin 1.6 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 01.09.2023, mori këtë:

V E N D I M

I. **ANULOHET** Raporti i Punës 04a/2023 i Komisionit të Ristrukturimit lidhur me procedurën e transferimit në pozitën e punës „Menaxher i ZR Mitrovicë në Departamentin e Koordinimit Rajonal dhe Operativës”, Vendimi DM 218/2023 i datës 09.06.2023 i nxjerrë nga Drejtoresha e Departamentit të Burimeve Njerëzore të Agjencisë Kosovare të Privatizimit, Propozimi me Nr.KR/25/2023 i datës 09.06.2023 i Komisionit të Ristrukturimit të Agjencisë Kosovare të Privatizimit, ndërsa lënda kthehet në *ri-shqyrtim* dhe *ri-vendosje* në Komisionin e Ristrukturimit.

II. **DETYROHET** Komisioni i Ristrukturimit në Agjencinë Kosovare të Privatizimit, që brenda afatit prej 15 ditësh nga dita e pranimit të këtij vendimi, të ndërmerr të gjitha veprimet e nevojshme ligjore për zbatimin e vendimit sikurse është përcaktuar në pikën I të dispozitivit, duke marr parasysh pikëpamjet juridike të dhëna në arsyetimin e këtij vendimi.

III. **OBLIGOHET** Drejtori Menaxhues i Agjencisë Kosovare të Privatizimit që të kujdeset për zbatimin e këtij vendimi si në pikën II të dispozitivit.

IV. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil më datë 07.07.2023 ka parashtruar ankesë me numër të protokollit 5097/2023 në Këshillin e Pavarur Mbikëqyrës për Shërbimin Civil të Kosovës, kundër Vendimit me numër DM 218/2023 të datës 09.06.2023 të Departamentit të Burimeve Njerëzore në Agjencinë Kosovare të Privatizimit, me pretendimet ankimore për shkak të shkeljes së dispozitave të procedurës administrative dhe Udhëzuesit Nr.02/2022 për Procesin e Riorganizimit të Institucioneve Publike dhe Sistematizimin e Nëpunësve pas Ristrukturimit, për shkak të konstatimit të gabuar dhe jo të plotë të gjendjes faktike, zbatimit të gabuar të së drejtës materiale dhe për shkak të gabimeve në sistemin e pikëzimit me ç 'rast komisioni në bazë të rezultateve të gabuara të vlerësimit/pikëzimit.

Bazuar në dispozitat e Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosijes së Ankesave në Këshillin e Pavarur Mbikëqyrës për Shërbimin Civil të Kosovës, më datë 07.07.2023 Këshilli ka kërkuar përgjigje në ankesën e ankuesit nga Agjencioni Kosovar i Privatizimit. Ndërsa Këshilli më datë 24.07.2023 ka pranuar përgjigjen në ankesë bashkë me shkresat e bashkëngjitura të lëndës.

Me Vendimin me numër të protokollit 5732/2023 të datës 21.08.2023, Kryetari i Këshillit të Pavarur Mbikëqyrës për Shërbimin Civil të Kosovës ka vazhduar afatin për vendosje të ankesës me numër A.nr.937/2023 të datës 07.07.2023 edhe dhjetë (10) ditë pune.

Kolegji për Shqyrtimin dhe Vendosijen e Ankesave, ka administruar këto prova: Ankesën e datës 07.07.2023 me numër protokollit 5097/2023 të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin e datës 09.06.2023; Vendimin e datës 23.02.2023; Konkurs-Zyra Qendrore në Prishtinë Departamenti i Koordinimit të Likuidimit; Kontratë punësimi e datës 06.05.2023; Shtojcë e Kontratës së Punësimit e datës 07.03.2011; Shtojcë e Kontratës së Punësimit e datës 25.09.2009; Kontratë Punësimi e datës 23.12.2009; Kontratë e Punësimit e datës 31.12.2010; Kontratë e Punësimit e datës 08.02.2011; Kontratë e Punësimit e datës 28.12.2011; Akt Emërimi me numër reference: 200/DL 13 i datës 27.12.2022; Akt Emërimi me numër reference: 217/DKL 13; Aktgjykim me numër PKR.nr.51/20 i datës 04.02.2022; Raport Pune 01/2023; Tabelën për sistemin e pikëzimit për vlerësimin e performances, përvojës, kualifikimeve dhe trajnimeve për ankuesin së bashku me shkresat tjera të bashkëngjitura; Raport Pune 04a/2023; Tabelat për sistemin e pikëzimit për vlerësimin e performances, përvojës, kualifikimeve dhe trajnimeve; Certifikatë e datës 13.06.2014; Certifikatë e datës 28.06.2017; Certifikatë për muajin shkurt 2015; Certifikatë për periudhën 14-15 prill 2011; Pasqyra mujore e pages për muajin qershor 2023; Kërkesë për përgjigje në ankesë e datës 20.07.2023; Përgjigje në ankesë e datës 24.07.2023; Vendim me numër Nr.Ref.BD-173/3 i datës 30.11.2022; Rregullore Nr.07-2022 për Organizimin e Brendshëm dhe Sistematizimin e vendeve të Punës në Agjencinë Kosovare të Privatizimit e datës 30.11.2022; Organogrami i Agjencisë Kosovare të Privatizimit i muajit nëntor 2022; Organogrami i Agjencisë Kosovare të Privatizimit i datës 25.04.2019; Vendim me numër DM.1118/2022 I datës 14.12.2022; Vendim me numër DM 37/2023 i datës 14.02.2023; Vendim me numër DM 184/2023 I datës 12.05.2023; E-mail i datës 23.12.2023; E-mail i datës 19.01.2023; Diplomë me numër Nr.664 e lëshuar nga Universiteti i

Prishtinës më datë 22.10.2008; Diplomë me numër Nr.361 e lëshuar nga Universiteti i Prishtinës më date 03.07.2013; Certifikatë e datës 13.11.2006; E-mail i datës 15.02.2023; Memorandum i Brendshëm i datës 16.02.2023; Vendim me numër DM 69/2023 i datës 23.02.2023; Vendim me numër A.nr.556/2023 i datës 22.05.2023 i Këshillit të Pavarur Mbikëqyrës për Shërbimin Civil të Kosovës; Zbatim i rekomandimeve të Vendimit të KPMSHCK me numër A.nr.556/2023 i datës 16.06.2023; Propozim me numër NR.KR/25/2023 i datës 22.05.2023; E-mail i datës 05.06.2023; E-mail i datës 13.06.2023; Vendim me numër reference: 02/2014 i datës 06.05.2014; Vendim me numër DM 297/2022 i datës 22.03.2022; Përshkrim i Punës i datës 06.02.2023; E-mail i datës 13.06.2023; E-mail i datës 13.02.2023; E-mail i datës 09.06.2023; Vendim me numër DM 218/2023 i datës 09.06.2023.

Kolegji për Shqyrtimin dhe Vendosjen e Ankesave pasi ka shqyrtuar dhe analizuar provat materiale të çështjes, konstatoi që lënda të kthehet në *ri-shqyrtim* dhe *rivendosje* të Komisioni i Ristrukturimit të Agjencisë Kosovare të Privatizimit, *sepse*:

Nga analizimi i shkresave të lëndës rrjedhë se ankuesi është i punësuar në Agjencinë Kosovare të Privatizimit dhe se i njëjti sipas Aktit të emërimit me numër reference: 141/DKL 13 të datës 29.12.2022 është emëruar dhe ushtron pozitën e punës, „*Kryesues i Njesisë së Likuidimeve nga AKP*” në Departamentin e Likuidimit.

Kolegji i Këshillit nga analizimi i shkresave të lëndës ka gjetur se Bordi i Drejtorëve, të Agjencisë Kosovare të Privatizimit me Vendimin me numër reference Nr.Ref.BD-173/3 të datës 30.11.2022 ka aprovuar Rregulloren me numër Nr.07/2022 për Organizimin dhe Sistematizimin e Brendshëm të Vendeve të Punës në Agjencinë Kosovare të Privatizimit dhe si rezultat i kësaj ka pasur shuarje të disa pozitive dhe ndryshime në përshkrimin e vendeve të punës të disa pozitive dhe ndryshime në përshkrimin e vendeve të punës në disa pozita, ndërsa përmes Vendimit me numër DM 1118/2022 të datës 14.12.2022 Drejtori i Departamentit të Burimeve Njerëzore ka themeluar Komisionin e Ristrukturimit për shqyrtimin e mundësisë së sistemit të çdo nëpunësi civil si pasojë e miratimit të Rregullores së re, i ndryshuar me Vendimin me numër DM 37/2023 të datës 14.02.2023 të Drejtorit të Departamentit të Burimeve Njerëzore.

Drejtoresha e Burimeve Njerëzore më datë 23.12.2022 përmes e-mailit e ka njoftuar ankuesin se me rastin e miratimit të Rregullores Nr.07/2022 për Organizimin dhe Sistematizimin e Brendshëm të Vendeve të Punës në Agjencinë Kosovare të Privatizimit, është shuar Departamenti i Likuidimit e si rrjedhojë është shuar edhe pozita e punës „*Kryesues i Njesisë së Likuidimeve nga AKP*” të cilën ankuesi ka qenë duke e ushtruar sipas Akt Emërimit me numër reference: 217/DKL 13 të datës 18.08.2014, ku dhe njëkohësisht ankuesi është informuar se Komisioni i Ristrukturimit konform dispozitave ligjore në fuqi, do të trajtojë mundësinë e sistemit të ankuesit në një pozitë të lirë ekzistuese.

Duke qenë së me Rregulloren Nr.07/2022 për Organizimin dhe Sistematizimin e Brendshëm të Vendeve të Punës në Agjencinë Kosovare të Privatizimit, është krijuar një departament i ri gjegjësisht Departamenti i Koordinimit Rajonal dhe Operativës në Mitrovicë, Komisioni i Ristrukturimit duke u bazuar në nenin 13 të Rregullores Nr.14/2020 për Transferimin e Nëpunësve Civil , lidhur me pozitën Menaxher i ZR Mitrovicë, ka përfshirë në proces të vlerësimit sipas pikëzimit gjashtë zyrtarë, pozita e punës së të cilëve ishte shuar, kurse sipas

Raportit të Punës 04/2023 i cili nuk mbanë datë të hartimit, nëpunësit civil të cilit i ishin nënshtruar procesit të vlerësimit sipas pikëzimit ishin vlerësuar: *Nëpunësja civile me 50.5 pikë; Nëpunësi civil me 48 pikë; Nëpunësi civil me 46 pikë; Nëpunësi civil me 35.5 pikë; Nëpunësja civile me 32.5 pikë* si dhe *Nëpunësi civil me 29 pikë*, duke propozuar që kandidatja me më së shumti pikë, respektivisht nëpunësja civile të transferohet në pozitën Menaxher ZR Mitrovicë në Departamentin e Koordinimit Rajonal dhe Operativës, ndërsa, përmes Propozimit me Nr.KR/25/2023 të datës 09.06.2023, Komisioni i Ristrukturimit ka propozuar që ankuesi dhe katër kandidat tjerë që nga data 01.10.2023, do të propozohet për transferim në një pozitë tjetër të shërbimit civil të lirë, pasi që të njëjtit nuk plotësojnë kriteret për asnjë pozitë të lirë në Agjencinë Kosovare të Privatizimit, dhe së konform këtij propozimi Drejtoresha e Departamentit të Burimeve Njerëzore ka lëshuar edhe Vendimin DM 218/2023 të datës 09.06.2023, me propozimin që ankuesi nga data 01.10.2023 do të propozohet për transferim në një pozitë të lirë të së njëjtës kategori në institucionin tjetër shtetëror.

Ankuesi në ankesën e parashtruar në Këshill pretendon se me rastin e zhvillimit të procedurës pretendon se me rastin e zhvillimit të procedurës së transferimit për shkak të ristrukturimit të institucionit lidhur me pozitën „Menaxher i ZR Mitrovicë” në Departamentin e Koordinimit Rajonal dhe Operativës, Komisioni i ristrukturimi ka zbatuar gabimisht dispozitat e Udhëzuesit Nr.02/2022 për Procesin e Riorganizimit të Institucioneve Publike dhe Sistematizimin e Nëpunësve pas Ristrukturimit lidhur me llogaritjet për vjetërsinë e nëpunësit civil në shërbimin civil, vlerësimet e rezultateve në punë të nëpunësve civilë, kualifikimet profesionale të nëpunësve civilë dhe trajnimet sa i përket pjesës së vlerësimit në pikëzim duke i vendosur të njëjtit 29 pikë, i njëjti shton se me rastin e vlerësimit i njëjti shton se me rastin e vlerësimit nga ana e komisionit në fjalë nuk i është vlerësuar periudha sa ka qenë i suspenduar dhe duke mos vlerësuar përvojën e tij si Kryesues i Njesisë së Likuidimeve nga AKP edhe përkundër Aktgjykimit me numër PKR nr 51/20 të Gjykatës Themelore në Prishtinë-Departamenti Special i datës 04.02.2022 e po ashtu shton se komisioni në fjalë lidhur me përvojën në pozita të ngjashme e ka vlerësuar me 0 pikë, duke mos e marrë për bazë përvojën e tij në menaxhim dhe administrim e as gjatë kohës sa ka qenë si Kryesues i Njesisë për Likuidimet e ber nga AKP si dhe edhe tek pjesa e trajnimeve nuk është vlerësuar me pikë reale por me zero (0) pikë ngase i njëjti pretendon se ka pasur trajnime dhe i njëjti kërkon nga Këshilli që ta aprovoj ankesën si të bazuar, ta shfuqizoj Vendimin me numër DM 218/2023 të datës 09.06.2023, ta anuloj Vendimin për emërimin e Zyrtares në pozitën e Menaxherit të Zyrës Rajonale Mitrovicë si të kundërligjshëm si dhe ta detyroj AKP-në që ti korrigjoj gabimet në tabelën e pikëzimit të ri ta njoftoj ankuesin dhe ti ofroj pozitë ekuivalente apo ndonjë pozitë të ngjashme ekuivalente Kryesues i Njesisë me gradë 3.7.

Kolegji i Këshillit pas analizimit të formularëve të vlerësimit, respektivisht tabelave të poentimit për gjashtë (6) zyrtarët e lartcekur në këtë procedurë të ristrukturimit lidhur me kalkulimin pikëve të mbështetur mbi kriterin e vjetërsisë së nëpunësit civil në shërbimin civil; vlerësimit të rezultateve në punë të nëpunësve civilë; kualifikimeve profesionale të nëpunësve civilë dhe trajnimeve, ka konstatuar se Komisioni i Ristrukturimit nuk ka zbatuar drejtë dispozitat ligjore lidhur me vlerësimin për secilin kriter, duke zbatuar gabimisht edhe formulat e poentimit të përcaktuara me Udhëzuesin Nr.02/2022 për Procesin e Riorganizimit të Institucioneve Publike dhe Sistematizimin e Nëpunësve pas Ristrukturimit respektivisht Shtojca Nr.1 lidhur me Metodologjinë e Vlerësimit dhe Sistemi i Pikëzimit për Kriteret e

Vlerësimit. Rrjedhimisht, nga vlerësimi i prova është konstatuar së ka devijim në kalkulim të saktë të disa kriterëve përfshirë vlerësimin e përvojës së punës, më ç' rast janë bërë vlerësime jo të sakta të përvojës së punës në shërbimin civil, aplikim jo i drejt i vlerësimit për përvojë pune në punë të ngjashme dhe për përvojë pune në punë të njëjtë, si dhe përvoja e punës në shërbim civil është njohur vetëm nga data e hyrjes në fuqi të Ligjit.Nr.03/L-149 për Shërbimin Civil si dhe duke aluduar edhe në një vendim të KPMSHCK pa numër dhe datë.

Përmbledhur si me sipër, Kolegji vlerëson së Raporti i Punës 04a/2023 i Komisionit të Ristrukturimit të Agjencisë Kosovare të Privatizimit, është akt administrativ i paligjshëm në kuptim të dispozitave të nenit 52 paragrafit 1 nën paragrafit 1.4 dhe 1.5 të Ligjit Nr. 05/L-031 për Procedurën e Përgjithshme Administrative ku përcaktohet se: *"Një akt administrativ është i paligjshëm nëse: 1.4. është nxjerre në kundërshtim me dispozitat që rregullojnë formën apo elementet e detyrueshme të aktit administrativ; 1.5. është në kundërshtim me ligjin material"*, ngase raportit në fjalë i mungon arsyetimi dhe se i njëjti është i mangët dhe jo i plotë si dhe nuk përmbush kriteret e nevojshme të arsyeshmërisë sikurse përcaktohet me nenin 48 të Ligjit Nr.05/L-031 për Procedurën e Përgjithshme Administrative, se cilat kanë qenë shkaqet vendimtare gjatë vlerësimit të dosjes së kandidatëve dhe arsyen pse metodologjia e përdorur e poentimit është e zbatueshme në rrethanat e rastit konkret dhe mbi çfarë baze ligjore është bërë, andaj, mbi këtë bazë shfuqizohet Raporti i Punës 04a/2023 i Komisionit të Ristrukturimit në Agjencinë Kosovare të Privatizimit lidhur me transferimin për pozitën "Menaxher i ZR Mitrovicë ne Departamentin e Koordinimit Rajonal dhe Operativës", si rrjedhojë janë shfuqizuar të gjitha aktet e tjera juridike që ndërlidhen me këtë proces sikurse në pikën I të diapozitivit të këtij vendimi, ndërsa lënda kthehet në rishqyrtim dhe rivendosje në fazën e poentimit të gjashtë (6) kandidatëve në këtë procedurë të transferimit.

Prandaj, nga se u tha si më lartë Kolegji i Këshillit thekson faktin se Komisioni i Ristrukturimit të AKP-së, me rastin e rishqyrtimit dhe rivendosjes në tersi të lëndës që ndërlidhet me procesin e procedurës së transferimit lidhur me pozitën "Menaxher i ZR Mitrovicë ne Departamentin e Koordinimit Rajonal dhe Operativës", duhet të ndërmarrë të gjitha veprimet e nevojshme sipas dispozitave të ligjit material, Rregullores Nr.14/2020 për Transferimin e Nëpunësve Civil, Udhëzuesit Nr.02/2022 për Procesin e Riorganizimit të Institucioneve Publike dhe Sistematizimin e Nëpunësve pas Ristrukturimit dhe Ligjit Nr.05/L-031 për Procedurën e Përgjithshme Administrative, me qëllim të konstatimit të saktë të gjendjes faktike dhe poentimit të kandidatëve ashtu sikurse përcaktohet me rregullat dhe udhëzuesin në fuqi, rrjedhimisht Komisioni i ristrukturimit duhet të kalkuloj saktë përvojën e punës në shërbim civil, duke marr parasysh që përvoja në shërbim civil të njihet që nga themelimi i shërbimit civil në Kosovë sipas Rregullores se UNMIK-ut Nr.2001/36 për Shërbimin Civil në Kosovë si dhe të marr në konsideratë edhe dispozitat ligjore referuar pezullimi të pozitës në shërbim civil në pajtueshmëri me provat referuar pezullimit të ankuesit.

Theksuar si me lart, e duke u bazuar në nenin 6 paragrafi 1, nën paragrafi 1.1 dhe nenin 18 paragrafi 1 nën paragrafi dhe 1.6 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij Vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se Vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.937/2023.

Kaltrina Avdullahi-Prenaj


Zyrtare e lartë për Bashkëpunim Profesional

Malsore GASHI-BAJRAKTARI


Kryetare e Kolegjit

Vendimi i dërgohet:

- Ankuesit
- Drejtorit Menaxhues të Agjencisë Kosovare të Privatizimit;
- Komisionit të Ristrukturimit të Agjencisë Kosovare të Privatizimit;
- Udhëheqësit të Burimeve Njerëzore të Agjencisë Kosovare të Privatizimit; dhe
- Arkivit të KPMSHCK-së.